

KENYATAAN AKHBAR
PENDAFTARAN PRODUK TRADISIONAL MYMEN PLUS CAPSULE 400MG
DIBATALKAN



1. Orang awam dinasihatkan untuk mengelak dari membeli dan mengguna produk tradisional **MYMEN PLUS Capsule 400mg** dengan nombor pendaftaran **MAL09082840TC** berikutan pembatalan pendaftarannya oleh Pihak Berkuasa Kawalan Dadah (PBKD) pada mesyuaratnya yang ke-256 bertarikh 27 September 2012 berikutan dicampur palsu dengan bahan yang mengandungi racun berjadual **tadalafil**. Pemegang pendaftaran bagi produk ini ialah **ZA Natural Herbs Marketing, Terengganu** dan pengilangnya ialah **Sabit Banani Industries Sdn Bhd, Kota Bharu, Kelantan**. Indikasi yang tertera pada label produk adalah digunakan secara tradisional untuk melancarkan peredaran darah, mengurangkan kepenatan fizikal, melegakan sakit sendi dan otot, melegakan sakit pinggang dan belakang, serta melawaskan system pencernaan dan angin.
2. Tadalafil adalah sejenis ubat yang digunakan untuk merawat kegagalan fungsi erektil atau mati pucuk. Ubat-ubat yang mengandungi tadalafil hanya boleh dibekalkan oleh doktor atau diperolehi dari farmasi dengan preskripsi doktor. Penggunaan tadalafil tanpa pengawasan doktor boleh menyebabkan kesan advers serius seperti **pengurangan atau kehilangan penglihatan dan pendengaran, penurunan tekanan darah mendadak sehingga ke peringkat merbahaya dan kesan terhadap sistem kardiovaskular seperti strok dan serangan jantung**. Tadalafil atau analognya adalah tidak dibenarkan dalam ubat yang dikelaskan sebagai ubat tradisional. Dengan itu, adalah sangat bahaya sekiranya produk-produk ini diguna

oleh orang awam yang berisiko tinggi terhadap kesan advers tersebut, terutamanya pesakit angina yang mengambil ubat *nitrate*.

3. Pengguna dinasihatkan untuk berhenti menggunakan produk MYMEN PLUS Capsule 400mg dengan serta-merta dan mendapatkan nasihat dari profesional kesihatan jika mengalami sebarang ketidakselesaan atau kesan advers. Orang ramai boleh menghubungi Biro Pengawalan Farmaseutikal Kebangsaan di talian 03-78835546/5539 atau email kepada bpfk@bpfk.gov.my untuk sebarang pertanyaan atau maklumat lanjut.

4. Sesiapa yang mempunyai stok produk ini dinasihatkan menghentikan penjualan, pengedaran atau penggunaan produk-produk ini dengan serta-merta. Penjual adalah diingatkan pemilikan untuk jualan produk-produk ini melanggar Peraturan-Peraturan Kawalan Dadah dan Kosmetik 1984. Individu yang melakukan kesalahan di bawah Peraturan-Peraturan ini boleh dikenakan hukuman denda tidak melebihi RM25,000 atau penjara tidak melebihi 3 tahun atau kedua-duanya untuk kesalahan pertama dan denda tidak melebihi RM50,000 atau penjara tidak melebihi 5 tahun atau kedua-duanya untuk kesalahan-kesalahan berikutnya. Syarikat yang melakukan kesalahan boleh dikenakan denda sehingga RM50,000 untuk kesalahan pertama dan denda sehingga RM100,000 untuk kesalahan berikutnya.

DATO' SRI DR. HASAN BIN ABDUL RAHMAN

Ketua Pengarah Kesihatan Malaysia

Pengerusi PBKD

Kementerian Kesihatan Malaysia